



REGULAMIN III BIEGU PO MOCZKA I MAKOWKI KAMRACKI BIEG WIGILIJNY Z LUXTORPEDOM



1. Po jakigo pierona mamy lotać:

- coby wiyncy ludzi lotało,
- chcemy pokazać jak piyknie je w Czerwionce – Leszczynach i na okolicznych hołdach
- Luxtorpeda też się chce pokazać
- no i żeby spolić trocha sadła przed Wilijom i Świyntami

2. Kto go robi

Bieg robi dlo Vos Stowarzyszyni Grupa Biegowo LUXTORPEDA (taki gibki cug) ze Czerwionki

3. Kaj i kiedy

Sztartujemy i kończymy we Szkole Podstawowej w Stanowicach na Szkolnej 7, gynał w same połednie w ostatnio sobota przed Wilijom.

4. Trasa

Do przelecynio je 10 km (tak na oko) po drogach, chodnikach i drogach polnych po Stanowicach. Bez przikopy lotać nie bydziecie ale za rowno też nie bydzie. Dejcie se pozor, bo może być ślizgawica i zumiynta, cobyście se krzywdy przed Świyntami nie zrobili!!

5. Jako to bydzie

Łod 10:00 do 11:15 możecie się zapisywać

Jak piźnie połednie – sztartujemy

13:30 – kończymy i fertig

6. Kto może lecieć

Każdy, obojyntnie czy Hanys czy Gorol, jak mo 18 lot, zapisoł się i je na liście startowej no i zapłacił za start. Trza też pokazać kartka łod doctora, że się je zdrowym i nie dostanie się hercszlagu, no chyba, że sami podpiszecie taki oświadczyni, kere bydzie leżało w Biurze Zawodów.

Aha, bych zapomniol – łebki też mogom lecieć ale muszom mieć łod mamulki abo tatulka abo jakigo opiekuna, kartka, że mogom startować.

Koźdy musi przisć do Biura Zawodów osobiście i musi się tam wylegitymować, coby my wiedzieli, że łon to je łon a nie jaki Kynijczyk za niego prziszol i chce wygrać.

7. Zgłoszynia

Mogecie się zgłaszać (Hanysy i Gorole tak samo) bez internet (<http://gbluxtorpeda.org/zapisy/>) do 12 grudnia 2014, chyba, że pryndzy miejsca się skończom (momy ich 250), jak bydom jeszcze wolne miejsca to w Biurze Zawodów. No i pamiyntejcie, że na lista bydziecie dopiero wpisani jak nom kasa przelejecie.

8. Wiele to kosztuje

W sumie to prawie za darmo je – yno 10 złotych abo wiyncy jak chcecie, coby Luxtorpedzie prezynt zrobić, jak zapłacicie do 12 grudnia na nasze konto. Potym yno bydzie szło zapłacić w

Biurze Zawodów ale to już dwie dyszki kosztuje (to chyba lepszy pryndzy się zapisać i zapłacić i mieć pora złotych w kapsie – zawsze na jaki maskety bydzie).

Jak kto chce rachunek to niech do nom znać.

Płacie na nasze konto a w tytule opłaty podowocie: Bieg po moczka, swoji miano i rok urodzynio.

9. Nagrody i gyszynki

- dlo piyrszych chopów i babek bydom piykne puchary i jeszcze piykniejsze dyplomy z podpisym Prezesa,
- koždy dostanie gryfny medal zrobiony chyba zaś przez Pyjtra,
- tak jak i łoński rok po biegu bydziecie mogli se pojeść moczki i makówek (yno nie za duzo, bo każdy se chce skosztować!!). Jakby jaki Gorole chciały na ni przepis to bydom se mogli wzionść.
- bydzie ciepły tyj,
- bydzie też geszynk dlo najfajnij przebleczonego,
- inne geszynki mono bydom a mono ni,
- to bydom ostatni zawody GRAND PRIX CZERWIONKI – LESZCZYN w lotaniu, no i na koniec nojlepsi dostanom nagrody.

10. i pora rzeczy na som koniec

- jak bydzie fest zima, abo padać abo nawet chyc 40 stopni to i tak lecymy,
- jak se zrobicie jaki ała to my za to nie odpowiadomy, jak chcecie to sami się musicie ubezpieczyć,
- dejcie se pozór na auta na trasie!!
- jak weźniecie numer startowy to znaczy, że zgodzicie się z regulaminym,
- regulamin my napisali i mogymy go zmiyniać jak nom się podobo,
- jakbyście chcieli wiedzieć coś wiyncy to wszystko bydzie na naszej stronie <http://gbluxtorpeda.org/category/bieg-swiateczny/> i naszym fejsbuku, mogecie też do nas pisać meile z pytaniami luxtorpeda.@gbluxtorpeda.org (yno nie zatkejcie skrzyunki).

Czekomy na Wos!!

